



秋澗先生大全文集卷第五十八

碑

渾源劉氏世德碑銘并序

金源氏崛起海東當天會間方域甫定即設科取士
急於得賢故文風振而人材輩出治具張而紀綱不
紊有國雖餘百年典章文物至比隆唐宋之盛若夫
篤志力學挾藝應選首破天荒魁冠多士父子昆季
相繼擢第爲名士大夫作良牧守文行端雅門第清峻
爲金朝第一流者其惟渾源劉氏乎劉氏出彭城望
族五季板蕩播遷朔土遼末遠祖諱用者居弘州順
聖縣之耀武關世業耕稼生子翰贈承德郎配張氏
追封彭城郡太君生撫字仲謙即今監察御史鄰之

高祖也始釋耒耜習進士業當遼金革命擾攘際學
未嘗一日廢天會二年肇闢科場公以詞賦第一人
中選惟遼以科舉為儒學極致文體厖雜萎蕪視晚
唐五代尤為卑下公勵精種學文辭卓然天成妙絕
當世一掃假貨剽切牽合補綴之弊其後學者如孟
宗獻趙樞張景仁鄭子聃皆取法焉金國一代詞學
精切得人為盛由公有以振而起之也釋褐右拾遺
轉知天城陽曲懷仁三縣擢大理正遷平陽府判官
安東節度副使兩貳大理寺出刺石州累官中大夫
年六十三卒於位翰林學士張景仁碑其神道公性
淳厚見義固執待物誠好誘掖後進三為理官議獄
主怒不屈於權嬰故多平反尤長於治民興利除害

若者愆然施設有條理簡便可持久所去見思圖形
奉事素愛渾源山水幽勝買田家焉晚号南山翁夫
人渾源雷氏北京轉運使思之女封彭城郡君生四
子曰汲曰渭田滂早世曰濬汲字伯深穎悟絕人早
傳家學與弟渭同擢天德三年進士屢為州縣有聲
累官朝散大夫應奉翰林文字西京路轉運司都句
判官平生寡合不羈慕郭林宗黃叔度之為人晚節
倦於游宦放浪山水間以遺興讀書為樂稱西崑子
述壽藏記叙其行已甚悉卒年五十八鄆王府文學
陳訥銘其墓有西崑集行於世屏山李之純引其端
娶曹氏追封彭城縣君一子偁字稚川大定十年進
士第積資奉直大夫豐王府文學兼記室叅軍孫一

從夔字和卿奉職出身善作詩曾孫文祖渭字仲清
少好學克紹箕裘既登第授承德郎知秦州隴城寨
事調隰州軍事判官終朝列大夫尚嵐州刺史號

老人一子价河水泊酒監曰濬廼鄰之曾祖博學
強記少有聲場屋間既而用廢入仕至安遠大將軍
饒陽令配張氏封彭城縣君生四子似似儼侯似字
稚行宣武將軍真定府軍資庫使三子從善字澤卿
彰德府酒監從臯字平卿從契字禮卿武義將軍克
勝軍副都統孫五人曰郊武義將軍曰邳等俱早世
似字稚章孝敬友愛出於天性力學能文稱其家聲
四試干庭不偶用恩賜第授承仕郎華州教授再任
承直郎主沂水縣簿娶王氏封彭城郡太君壽五十

五終於家遺文雄深簡古有迺祖風嘗訓子孫曰為
士當先行檢如絲之潔將立其身慎無點汙汝佩吾
言則無忝矣故屏山李純甫表其窀曰善人劉公之
墓其為士夫之紀蓋可見矣一子從益字雲卿自髫
鬣時已有成人度擢大安元年進士乙科調鄆陽丞
長葛簿陳州防禦判官皆有治績投機應變措畫出
衆意表進提舉南京路推貨事丁沂水君憂起復拜
監察御史君負材尚氣資之以學欲使事業表表大
見於世一旦戕與志合所言 朝廷紀綱時政利病
竟與宰臣辨論得失不屈去戕閑居淮陽與諸生講
明伊洛學久之選令葉縣至則鋤強剔蠹豪族惡黨
禁不敢少肆請免逋租三萬石致流民自歸者口數

千大起孔子廟既樹教本集諸生肄習其中風化大
行考課爲河南最末幾召入翰林爲應奉不踰月而
卒得年四十有四雷御史淵誌其墓趙翰林秉文勒
銘神道皆稱其器識明敏剛直敢言學可以輔政教
材足以濟時艱實志以歿士論惜焉禁民至廟而祀
之孔子稱遺直遺愛者豈近是邪蓬門其自号也蓋
取南山翁誠子詩元自蓬蒿出門戶莫交門戶却蒿
蓬之句有文集十卷粹而瞻通而不流類其爲人丙
子嚴氏封彭城縣君子二祁郁祁字京叔少穎異爲
學能自刻厲有奇童目弱冠舉進士庭試失意即閉
戶讀書務窮遠大涵濶鍛淬一放意於古文間出古
賦雜說數篇李屏山趙閑閑楊吏部雷御史王溥南

諸公見之曰異才也皆倒屣出迎交口騰譽之及與
御史公退居於陳相與講明六經直探聖賢心學推
於躬行踐履自是振落英華收其真實文章議論粹
然一出於正士論咸謂得斯文命脉之傳壬辰北還
鄉里躬耕自給築室榜曰歸潛歲戊戌

詔試儒人先生就試魁西京選充山西東路攷試官
後征南行臺拈合公聞其名邀至相下待以賓友凡
七年而沒享年四十有八翰林承旨王磐誌其墓娶
史氏洛陽名族一女適前監察曰芝子文冕一男景
山終國史院編修官孫一興同有神川遜士集二十
二卷題言四十三篇歸潛志三卷行於世郁字文季
亦名士中統元年肇建中省辟左右司都事出尹新

河召拜監察御史能文辭工書翰別號歸愚卒年六十一娶趙氏前禮部尚書璜之女一子景嵩鄴字伯震一子景巒儼字維昂鄴之祖也登承安二年進士第累官至中奉大夫秘書少監壬辰北渡痛宗國云
亾蹈河而死配李氏封彭城郡夫人三子從禹字虞卿登正大七年辟賦第官至朝散大夫同州錄判一子曰都從愷字舜卿自幼卓犖不羣稍長入鄉校擅能賦聲再舉不契就廢補官授武義將軍登封主簿已能綜覈縣務束濕吏曹人不敢以少平書生易之國初生聚稍集遴選廉能急於撫字辟府君攝領韶州事繼真授宜陽令縣當兵後庶事草創高下
於下車廉知其利病休戚斟酌而更易之凡科取差徭

必驗其等第俾均輸焉暇則集俊秀於縣庠講明禮義美善風俗為政才暮月而頌聲四達終更授河南府路經歷素精吏事婉畫恢恢刃游餘地致六房無滯務公餘與紫陽楊文西菴楊公九山李子微薛庸齋微之觴詠於泉石間中統四年正月廿八日以疾卒於私居之正寢壽五十有五娶張氏宣德望族貞靖柔懿自在父母家已稱純孝及歸于我事舅姑恭順飲食服御非經其手不進也終於至元北三年十月廿日享年七十有五
葬合祀人鄺字君美平江路人匠提舉至元三十一年十一月以疾歿得年五十有五配段氏享年四十有九鄺表部場管甸鄺才識警敏練達時務由省掾授承務郎工部主事次陞承

直郎順德路總管府判官選充監察御史女二長適
渾源州王氏次適應州元帥韓公之孫孫五紹祖江
浙省宣使慶祖澱山巡檢繼祖勝童乞童從稷字賢
卿終濟南路儒學教授三子曰郇曰柳曰郭侯承奉
班祇候遂州酒監一子從周字文卿劉氏先壠始葬
順聖之耀武關南山翁徙祖營於渾源縣東北黃崑
鄉御史君以世故流離起先塋於宛丘神川旅殯洹
水歸愚定安燕山令鄰奉大父中奉公衣冠及考妣
極安厝於河南北印之原是爲渾源劉氏洛陽新任
鄰復欲彰先懿昭孝思圖不朽諗不肖嘗問學於神
川先生知其家世頗詳持張陳李趙雷王諸公銘誌
求述世德碑以猥列後進年迫衰謝不能發越先賢

事業且何敢秉筆於諸名勝之後堅辭者久之鄰復
曰金亡士之北渡者百不二三今消磨已盡求接見
先輩老於文辭而最知名者莫公若也今弗惠顧則
先世之事將何於託不獲已廼採掇諸公緒餘及已
之聞見而知者會歸其極而系之銘銘曰

漢庭射策

貢士遺風

排黜百氏

仲舒是崇

唐文三變

敗北無從

振起衰蕭

尊昌黎公

兩公傑出

莫之比隆

考其胤裔

孰繼芳蹤

大名難再

氣數奇窮

金源立國

網羅才雄

首魁多士

惟南山翁

程文妙絕

一世師宗

當時景仰

韓董攸同

子孫克肖

家學是攻

魏科七决

聲華摩空

故家文獻

泱泱大風

蓬門卓尔

世業克充

言直行果

節効匪躬

支撐傾頽

致時之雍

賁志雖没

留名則鴻

中奉矯矯

取貳大蓬

存亾惟義

表我孤忠

子孫昌熾

為報則豐

神川力學

洞聖心曾

明理貫通

匪文奚工

玉佩瓊琚

大振辭鋒

導家學之淵流

會百川而朝東

章甫適越

惜不時逢

陰相同氣

先志恢洪

朱衣白簡

乘御史驄

何劉氏之多賢

試紬繹其始終

種德植善

無踰於農

立志務學

祿在其中

忠義仁恕

傳嗣彌縫

維人事之克盡

見天理之昭融

宜澤流渾水之源

青蔚南山之峯

北印之原

巋然新宮

世故牽率

匪忘祖封

是惟金百年文宗之裔

過者敬恭

大元故廣威將軍屯田萬戶

聶公神道碑銘

皇元以神武戡定區宇剪金取宋保塞一軍號稱雄

勝帥閭堂堂節制於上亦由部曲宣力得其人故也

况耳氏與蔡國張公奮跡布衣義同里閭依乘風雲

奕世竭節者哉公諱禎字正卿世為定興沈陶井里

人曾祖洎大父皆在野不仕父福堅資豪偉善騎射
國初張公團結鄉義柵西山之東流塢選推為百夫
長從定河朔取汴蔡有殊績終襄縣屯田總管母夫
人段氏同里大家生四子公其長也幼沈鷲寡笑言
不作群兒嬉及長聰敏好學有謀略慷慨尚氣節年
十七嗣襲父職張公察其才武試以攻守之方為問
條對洒洒有成筭公愕然不復以嚮之吳下阿蒙為
昧歲丁未率本部分功立杞城亳阮宋人出沒以絕
侵軼之患繼攻泗州前後以功受賞有差己未扈
世祖皇帝渡江攻鄂渚拔螯孤先登陷東南城堞都
督戰親覩壯其勇酌酒飲賚以紀其功其年冬
命領千兵迎援大帥兀良合歹於長沙水陸轉戰備

嘗艱苦竟達漢陽由是陞總轄仍佩銀符中統三年
賊壇叛公攝千夫長分圍歷城接戰嘗先諸道兵蒙
賜鏐馬俾激士氣壇平遂南城荆山至元六年真授
千戶易以金符是年

朝廷進軍襄樊公屯守鹿門甚力至元七年行臺命
公將番漢馬步三千人取新興寨公曰彼衆而恃險
我客而力不一惟當神速掩其不備可成功尔遂一
戰而克斬馘不勝計生擒者七十人賞楮幣四千緡
至元十二年分隸元帥孛魯歡收連海淮安等州宋
守將許安撫者陳艤艦五百艘以俟公帥麾下直擣
之許少却水陸乘之彼軍大壞殺死溺水者十七八
盡獲其戰艦噐仗帥府上功奉

旨陞武節將軍繼攻下招信泗州階進宣武時孽宋
已亡江西湖南皆內附獨靜江恃其險遠旅拒不下
上以亳軍素精銳戰必勝攻必取命摘全軍進擊至
則賊勢披猖公率猛士深入殊死鬪首奪西南城堞
衆隨之以進城陷捷聞加授顯武將軍行軍總管桂
境雖平大兵後所在草寇切發充斥山谷間爲良民
梗衡山茶陵尤稱搶攘帥府稔公威名烜赫摘諸翼
兵千人徃平之公窮竟窟穴夷扶根株其脅從汙染
者諭歸田畝非邑按堵軍無私焉所在老幼擁馬首
泣拜曰非公活我吾四縣遺民二十餘萬無噍類矣
其戢禍亂威愛兼濟有古良將風既而蒙古漢軍都
帥張侯以公部曲故家屢立駿功請於朝復備將佐

十七年從張侯入覲進拜明威將軍亳軍副萬戶仍
賜錦袍一襲旌宿勞也俾鎮建康尋移維揚十九年
選充江淮都漕運使二十五年改任廣威將軍大都
屯田萬戶一載間區畫營屯耕稼有法比前政收穫
爲倍蓰二十六年更授右翼萬戶田旌閃閃有萬屯
曉唱之樂至元廿六年三月十六日以疾卒於官享
年六十有二葬祖塋公資外嚴毅內廓如也孝於事
親忠於爲國出天秉固然治軍旅號令嚴明部伍整
肅臨陣抗敵挺身決戰略無顧惜故每戰有功聲名
烜赫暇則讀書不輟左氏傳通鑑戰國策皆通大義
古人良法美意竒計偉畫涉獵融會多見諸行事方
經略南服母夫人陳氏尚在堂公殫心王事不遑暇

然遺親之念未嘗置頃刻也一旦心神內動此流被
面曰豈吾親有故動於彼而應於此邪即請歸覲比
至太夫人喪尚未斂公攀號屢絕痛其終之無所存
活克襄大事鄉里感嘆為平昔孝誠所致夫人郭氏
同縣南王里人溫純恭謹奉事老姑怡順進退不敢
自專年逾四十夫貴子長應對門內事尚以名稱姑
病早落侍養不少懈倦湯劑必嘗而後進及亡朝夕
廬祭者三週歲宗黨號曰孝婦待妾勝有恩礼略無
嫉妬子一十一人長曰惟義承父爵右翼屯田萬戶
次曰惟謙峽州夷陵尹曰惟明閤門宣贊舍人曰惟
孝惟爵未仕皆郭出也余幼未名女四人俱適望族
元貞建號之二載冬十一月惟義踵門來請曰自惟

無所肖似尚賴先世遺澤嗣守緒業朝夕惴惴愧無
光揚惟是鑽石紀銘表諸神門圖報萬一稔聞翰學
先生學古詞達當代將相家皆有煥於下執事僅得
銘則為不朽矣中統建元余應召中省獲識祭國父
子及提憲河朔郎山雞水之間亦嘗廵歷載惟疇昔
輒次其件右而繫之以辭銘曰

大夫挺志

無先外事

况乎戰陳

聖所慎愆

不有諸內

孰形於外

攬我秉彝

克作其氣

惟燕南陲

聶宗所系

奮從雲雷

以功名憲

侯不封萬

志焉罔遂

報之後人

福祿何既

桓桓廣威

克昌再世

曉暢戎機

蔡國首噐

發蹤指獸

俾展其翼

橫戈長江

斬鱷蒼海

萬竈同心

雅歌奏凱

長驅靜江

指顧摧敗

草切蟲如

肆為民害

玉石既分

善良攸賴

笳鼓歸來

旌旆揚彩

酬功進爵

大蒙天資

高大門闕

鄉閭歎嘅

不知其中

大本有在

子曾有言

質而弗礙

篤孝惟移

化而忠義

公於臣子

存沒無愧

巨川騰波

即峯登翠

片石干霄

千古光配

大元奉聖州新建永昌觀碑銘并序

奉聖本秦上谷郡地唐始立新州石晉割賂於遼更
今名亡金陞武定軍節度今雖為州當兩都往來之
衝其地望尤重於昔雲山環抱川流交貫樹藝茂盛
有中土清淑之美風俗雄碩樂施而好善蓋燕雲習
尚氣義而然也據治城東南里許有道觀曰永昌其
初祖寂然子張志玄隱微世居河東之孟門縣越自
騷亂敬挹真風從平水景鍊師為全真學既長正一
法籙亦稱精究貞祐南遷所在依擾聞長春丘公應聘
龍庭師喟然嘆曰天道在北吾將遠遊雲朔庶有遇
合聿隆道紀至永興之清樂鄉愛其山水幽勝遂結
茹而居凝神坐忘志趣叵測謁漿之家咸異之曰彼
其中必有所得豈徒然哉由是風動一方日奉香火

羅拜菴前間有請必恍然開悟廼相與選勝得獨山中水頭地起建琳宇處師爲上賓榜曰迎仙尊顯之也師佩上清三洞靈章主盟武定者幾北載前後化度門人甚衆惟吳張盧三法師得其要妙而吳在伯仲爲寂寂然謝世藏觀南化臺吳號通玄子氣白魁偉志行誠篤体含妙用動達玄機寂然師知爲受道器常勉之曰汝舉止異常言論卓犖通文辭知醫藥恐鸞翔鶴翥終非草野間物寂然既終行緣城市人或叅扣誦答如流有一鉢千家飯渾身百衲衣心如江月朗情似堊雲飛之句其曾懷洞徹如此加以符水療疾憶痛隨愈衆驚異以有道目之達官豪右共來敬禮至有得望其風采而爲幸者闔境尊信法緣

契合遂易以金劉大監別墅爲棲真所中有亭崇臺層檐爲一境偉觀即改亭爲殿奉三清辟容下逮齋厨庫廩以次修舉署曰永昌與迎仙爲上下院自是徒衆雲集檀越之家設醮筵而徼冥福求符藥而濟災屯者憧憧而來曾無虛日鍾磬之聲隱然聞市肆間永昌琳館爲一方名勝道俗歸依之所矣通玄仙去寧神於永昌之南以後事付上足弟子虞法師師行業修潔和光同塵心存濟度多蒙藥惠補治遺缺而觀之規爲始克完具以推擇充玄門道錄虞寂陪葬師側其徒崔志善踵而增飾之崔沒盧法師以道錄來住持焉傳之門人李道素道素姿朴實惟恐過逸前光內則起廢寮舍外則增置田園朝夕齋戒載

勤頌禱望高羽流擢判管內道門事廼惴惴不遑曰
向上師真剝心勞神披荆榛撥瓦礫鋪敦教基吾輩
何有坐享其安惟是刻石紀行俾見興建本末庶垂
不朽來丐銘予以道不同不相為謀牢讓者再請益
聖乃酌取大方家見於吾儒之紀載者論次而銘之
後世所謂道家者流蓋古隱逸清潔之士矣巖居而
澗飲草衣而水食節欲以清心修已而應物不為軒
裳所羈不為榮利所怵自放於方之外其高情遠韻
凌煙霞而薄雲月誠有不可企及者自漢以降處士
素隱方士誕誇飛昇煉化之術祭醮禳禁之科皆屬
之道家稽之於古事亦多矣徇末以遺其本凌遲至
於宣和極矣弊極則變於是全真之教興焉淵靜以

自治簡便而易行翕然從之寔繁有徒其特達者各
開戶牖日名其家若寂然師弟弘衍博濟教行山比
是也耕田鑿井自食其力垂慈接物以期善俗不知
誕幻之說為何事敦純朴素有古逸民之遺風焉而
又昇授得人顯揚斯在是可書定安之白雲觀盧法
師建永興之觀張法師建興永昌同一法眷也銘曰

道之大原

玄文五千

慈儉不爭

清靜自然

辭固奮激

至理無邊

修道謂教

由是之焉

全真為學

本乎善淵

返純還朴

復太古前

究其源委

豈忘蹄筌

寂然出世

私淑其傳

雲翔俗勁

聞善易遷

坐忘感化
克興大緣
化行城府
道價翩翩
燕處有室
基緒綿綿
光揚有例
何千百年

孰分後先
絕壘而下
重闡法筵
香火奔走
耕鑿有田
門人繼承
刻銘琬鐫

傾心信嚮
復得通玄
一時景仰
先業昭宣
遺我後人
持守拳拳
流光遺照

大元故正議大夫浙西道宣慰使行工部

尚書孫公神道碑銘

并序

雲西風土雄碩龍山峻極為之奠焉渾流交貫神川
清淑資其潤焉故士生其間有瓌竒宏傑之稱而劉

雷為之冠焉然山川炳靈奚間今昔况河洛為帝王
之里并汾多攀附之臣儼景風雲依光日月者哉若
乃始以材技有光世緒終則挺輪忠蓋作時名卿安
榮福壽慶流後裔者誰乎故宣慰使工部尚書孫公
其人也公諱公亮字繼明世家渾源橫山里曾祖諱
伯大父諱慶文咸勤力務本不耀其光顯彌諱威為
人跡弛不羈早以功名自憙少有巧思肄函人民業
繕治堅密出新意於法度之中方
太祖聖武皇帝經略中夏總攬豪傑貯除戎具為亟
廼挾所業投獻上賞其能應時需賜名也可兀闌
錫佩金符充諸路甲匠總管
太宗朝從征秦晉惻民被屠戮屢以蒐簡工匠為言

賴全活者衆顯姓杜氏主內務有綱紀嘗辦雪工徒
質逆之誣因之脫死公生漠北年十許歲總匠君挈
之入覲

太宗異其風骨曰此兒他日必大享用蒙賜御饌自
是得出入禁闈矣及長資英明多藝能慷慨有大志
練習國典通曉譯語所交皆一時豪雋衆亦以通
材許之庚子歲襲父職佩銀符

定宗朝換金符歲進課精例賜錦幣
憲宗特資貂裘仍勅繼稱父賜名

世祖皇帝在潛邸上命歲輸百鎧有中七矢而不
貫者其堅完如此及南征果獲用中統建元授都總
管上北征臨晉沒敵公出私財製甲冑六千襲以

獻天顏喜甚錫銀笏與甲教同自是忠結主知矣

繼命領諸路雜色工枝奏出綉女四十妻工之鰥者

歲支衣糧贍濟不給諸局廩給自此始又考制度定

程式作諸路恒法公自承嗣選材訓工招亡恤弱出

私財以代公費良藏獲而佐軍興至蒙賞進秩可謂

盡心所事克荷祈薪然以人材抱負論之于將補屬

寶鼎枝車未膺所用有鬱悒不能自己者至元改號

朝是清明治具畢張公上章抗言宜設御史臺肅正

紀綱雖不遑有符士論偉之五年憲府肇建特拜監

察御史官忠翊校尉上諭大夫塔察公曰他人則

未之識如也可兀闡朕熟其忠廉宜與汝共事時官

僚極一時選較夫多識朝廷故事洞達諸色情狀材

氣足以投赴事機威望可以懾服豪猾在公無以踰者一旦職與志愜思明目張膽鯁言無忌仰答恩遇自是風生白筆氣凌霜簡論列無虛日時宿衛鷹房憑恃城社頰縱恣在他人弗措手者公優爲之如上都濟時門強奪民物東安州縱馬馳鬪食桑束甚至斫伐爲薪公痛繩之以法至知所畏避上聞而以硬目之八年考滿憲長奏公自供職無點水私至絕親戚宴飲風稜銛利刺督切中稟行無出其右上曰朕特選擢正爲此爾可再任俾矜式新進者既而察行爲外事追還西川行者冒支楮幣二萬餘定覈按興元帥臣畧民爲奴役兵士治第採新至彼虎噬死追葬具給喪出奴爲良五十仍奏治其罪十

年夏宣授金符武德將軍簽山東東西道提刑按察司事至則務實用顯效張皇憲度故材廉者必薦姦貪者必置於法州郡惴惴奉約束惟謹褻帷具瞻有風動百城之日東平路監尹出貴戚簡重自居監司官至郡未嘗相覲聞公來按部迎謁境上糾治豪縱不法者十數輩曾無一語護援及去復伸餞禮博德高唐耆老賄香於頂來迓曰自立憲司未覩稱職如公者我輩獲安田里受賜多矣其威望顯著吏民畏服可知已十二年陞山北遼東道提刑按察副使遼東境土曠遠諸王營帳泊諸部種人雜處其間恃勢相凌爲申嚴法禁革去宿弊豪強斂迹小民氣得少伸分司遼陽親王近侍五人劫居民資用且歐擊之

有司不敢究民來訴即械五人徇通衢王諭釋其罪
竟杖決之潦水闊而雜沙石自昔無津楛命造荆絡
貯碎石爲柱以成橋做此建者百所自爾遼右免病
涉之苦十三年進階朝列十四年春陞授中順大夫
彰德路總管分佩金虎符惟相當南北衝會民物繁
夥自昔爲河朔名郡然政務煩重視鄰路爲蓓蕪公
諳練政體材地有餘當王事空集訟牒交至泛應曲
當不失時措之宜平生遇事有爲一旦重膺民社廼
究竟利病俾實惠及民以三事躬請於朝其一比歲
霖潦傷稼民多闕食准免逋稅九千七百石其二諸
郡輸迤取道本路徵發車牛越廣平抵順德往還餘
五百里非惟偏倍恐民力不堪蒙以廣平之磁州代

焉其三本路稅粟歲輸大名秦家渡由唐宋渡河東
南行百五十里歲晏寒沍車人告病聽於唐宋倉輸
納前政貸民資五百餘定起新附軍營舍至是亦給
公帑刑民李閏六嘗殺人累問弗伏干證餘百人移
公推密廉其實遂伏辜餘得釋時以神明稱終更相
人懷思至琢石頌焉江淞平 上諭中書省造作事
重當選能者主之十六年冬授正議大夫浙西道宣
慰使兼行工部事籍人匠四十二萬立局院七十餘
所每歲定造幣編弓矢甲冑等物十八年 上命左
丞相阿剌罕等征日本給辦艤衝戰具繕製堅完都
將以聞 上曰也可兀闌豈有誤邪二十年十月來
朝大爲 上所獎諭賜宴於便殿二十二年授江西

等處行工部尚書上章致仕閑居清苑每風憲泊臨
民官來質疑必告以益國便民之方二十四年九月
觀上於朝殿上念世臣之舊問年今幾何居某
處子孫幾人奏對畢賜食俾坐於御榻之西上遣
大府卿納里忽問曰飲餼飽未復賜鹿羹白酒沾醉
而出大德元年子拱總尹大同奉公與夫人張氏還
鄉里時公及夫人壽俱高日與親友相飲宴鄉人榮
之改渾源西北山曰畫錦有司亦用名鄉四年正月
廿九日以疾薨于私居之正寢享年七十有九遺訓
子孫勉力忠孝少不及私二月十四日歸葬于渾源
州西劉村先塋之次送葬者數千人哭聲聞數里外
蓋平生感懷於人者如此夫人張氏梁氏皆出名家

張氏終於四年秋壽八十有四梁氏先公沒子三人
拱資誠實材果純孝力學由工部侍郎陞受少中大
夫大同路總管兼府尹本路諸軍奧魯總管管內勸
農事撤武略將軍武備寺丞振忠翊校尉定海縣尹
女三長適安平縣尹趙襄次適李氏劉氏孫男四謙
襲世職從仕郎保定等路軍器人匠提舉次早世諧
承直郎利器庫提點誼進義副尉保定等路軍器人
匠提舉孫女三適趙氏王氏次幼曾孫男一猥頭曾
孫女三長適李氏餘幼公儀觀魁偉氣量鏗闕美鬚
髯容色莊厲閑習時體譯語闡翻雜以談詡顧國種
貴卿無以易其論列公朝集議僚屬處正奉公詞情
剴切毫髮不假借善為鉤距能得小人根株窟穴似

夫古之能吏才大夫至於奉上忠事親孝交友誠雖位望顯赫循循謙讓退然如無能為者齊家教子敦篤義方循尚禮法又似夫齊魯負行之士生平疾惡由義激中其心休休樂善成美出於天稟粹厚放良臧獲百餘人貸貧民子錢七萬緡宜其二任風憲位正總尹丕張世守官蓮六卿剛直有守名協士論忠勤無間簡在帝心福壽綿延子孫衆多家門隆盛雖曰依乘亦由平昔操履感召有以致然也可謂材德具備勲名兩全哀榮終始者矣嗣子拱以墓碑來請因憶至元戊辰憲臺初立公與不肖同擢御史引見世祖皇帝於廣寒殿自爾議事松廳聯鑣駟馬義氣交孚相得為甚歡後借官於相迨歲壬辰應聘北

上復私覲保塞追叙契舊當時並職豸冠今所存者獨吾二人公又奪去僕雖耄忍無一言邪既叙梗概仍系之銘銘曰

雲龍奮飛西北天

神武載造坤與乾

有來羣后捷戎軒

所在戈甲相周旋

孫侯挾技善達權

賜名訓徒畀任顯

函惟扞格貴弗穿

函雖多樣公發源

犀兕七屬光生煙

上為嗟惜賞世延

風雲儷景同翩翩

執藝諫請多活全

臧孫有後理固然

公其挺生鍾世賢

詞興遺緒心彌丹

鯤化躍出天池淵

豸冠執法班朝端

憲綱未舉為進言

太微一夕光星纏

朱衣白簡相後先

忠臣憤激同鷹鷂

秋風搏擊無空拳

上目剛直由孤騫

青齊遼碣海岱連

地廣物衆牙孽間

繡衣風彩何翩翩

積弊一剷摧邪姦

耻令趙張出吾前

煌煌金節臨漳洹

霜空霽嚴政春妍

侯伯正位務固繁

剴裁錯節驚龍泉

吏惟寬悞猛則殘

要本實惠蘇民綿

三事上請民力殫

轉輸省便逋賦蠲

橫歛追給公府錢

去思有頌德化宣

江洲平一俗巧儼

訓授程課需世官

共工汝賢常伯聯

工局染院勞次銓

歲時供億物利堅

聖皇眷顧稱忠愷

功成身退名節完

作牧鄉郡意所便

卅期福壽方綿綿

停雲萋萋橫之巔

神遊淒斷招來篇

乘時樹立孰敢有

鬱鬱紫氣衝斗邊

英聲並與斯銘傳

一朝上章遽引年

嗣侯亞卿請外遷

錦衣榮養白晝鮮

丘山零落館舍捐

時有白鹿馴其什

自昔豪傑誇雲燕

千年鬱劍埋神川

何以驗之瑤有鐫

秋澗先生大全文集卷第五十八

秋澗先生大全文集卷第五十九

碑

大元國衛輝路創建三皇廟碑銘有序

衛之廟祀三皇權輿於

國初醫家若流因城隍祠右故壇屋而像之庸申歲時瞻仰之懇然位置迫隘規制卑陋不足以妥靈揭虔爲神明觀府監尹荅失帖木兒顧其如是蹶然于中私自念言當尊而侈大之心有所在而時則未遑也伏承

登極詔條聖帝明王守吏致祭廟宇傾圮官爲修葺至大德庚子歲夏仲祠部頒降三皇禮秩以春秋二時饗獻蓋宗本醫學拯恤元元也而昔構不稱安能

儼肅禮容光昭祀典哉侯乃咨謀於僚屬曰

明詔所當夤奉民力不可妨奪工匠不可徒役公怒

不敢擅發也當首出俸稍以為倡率少尹八思麻因

判寮高興仁推官馮珺相與贊襄下逮屬吏醫師筮

士從風皆靡聿來胥宇於是相治城北郭汲署故址

爽朗方術奠啟神居經始於是歲冬孟斷手於明年

季夏為禮殿三巨礎松栢旅楹奕奕挺昂望雲就日

儼若帝者之所其臺門洎醫學講堂齋室以次修舉

其秋因常禮禮奉安神棲儀物肅備薦獻通暢士民

來觀懽忻贊嘆謀斷石紀績傳示方來持學正邪伯

易事狀以修建碑銘為請不肖念鄉榆盛事其敢以

衰毫辭夫德高太上者宜垂不朽之名澤及萬世

者當享天下之祀鴻荒肇判為生民害者多矣三聖

繼作觀象化民創物垂範如畫八卦以通天地之情

造書契而代結繩之政耒耜以資耕耨舟楫而濟不

通衣裳宮室既厚其生棺槨斂葬復恤其死交賄貨

而易有無剋弧矢以威強暴然後民得安居而粒食

優游以卒歲孔子繫易叙太皞神農軒轅氏功德如

此其見於醫家說者謂神農氏一日嘗齒物毒七十

餘種軒岐論難本乎大道而究乎死生之奧故近代

猥為主祀若以三

聖人開天建極利生民而仁後世者論之特一事尔

在泝流求源雖出於人心之至情而報本反始乃有

國之令典按歷代祀秩曰皇曰帝惟唐嘗置廟京師

餘雖多文定於故都三年一祭而已我
國家掃攬搶以清華夏斷鰲足以立四極還純反朴
崇德尚功三年故都之祀亦嘗舉行迨
聖天子當宁道媿生成仁含動植祗嚴忠祠克作
神主開建醫學德洽好生故有司推廣
睿意俾同通祀致祠廟徧于天下其敬恭之典越至
矣乎伊守土臣奉承准謹規為有方不傷財不役民
未及闋歲而起百年偉觀事神治人可謂能也已
是
宜銘銘曰

林林總總 厥初民生 理具畫一
七鑿方萌 軋端坤倪 軒豁露呈
孰指其一 底於和平 聰明惟亶

體用斯弘 三聖繼作 見天地情
裁成輔相 以逸以寧 躋民仁壽
萬世作程 德至孰邁 道大難名
功同元化 罔知申行 推原報本
在在通祀 大德之政 思合幽明
恪於奉承 尊隆莫京 惟守土吏
聖靈在天 與時降升 闕安聖靈
品物咸亨 云何事神 而瘳於泯
翼翼禮殿 有儼神庭 民初不預
吏亟經營 維皇降止 庶監嚴誠
風雨時若 歲事屢登 民浸福澤

豈曰吏能

謹夫歲月

爰勒斯銘

事神治人

績用昭稱

煌煌麗石

永垂頌聲

表碣

文通先生墓表

先生諱天鐸字振之姓王氏世為衛之汲人曾祖諱仲祖諱經顯考諱宇妣孟氏由農而士沈于先君蓋四世矣其本支德澤與夫出處之大致已饒諸埋石茲不復云惟其心之與學達於政而明夫用之所當然者敢發越以昭于外初先君既冠以家學魁多士已而嘆曰君子不可以虛拘是足以盡吾學乎且夫之所昇於我者何如我能克而復之以塞夫所以昇

六考終于家遠近計聞來會哭者踰月如知巴丁郎
中居寶石處士德玉單侍講公履烏宣慰貞等垂淚
而言曰天不少假公年俾為我輩著龜今而後過將
孰寡矣仍以文誄之至有識敏學精是既錫之以重
彼胡奪之以輕逝長川而中流絕涉遠路而半道
車傾其為時賢敬惜如此明年戊子春三月改葬于
康公里清水原猗渦之洄曲奉常宋銜教授趙澄郝
榦進士太原劉冲邑大夫李瑞僉曰先生卷德丘園
學貫三極其行與業為國人所矜式可謂敏學先物
達夫世用者也遂相與據法而謚表其封曰文通先
生之墓夫人永和靳氏進士子玄之孫安陽丞顯思
之女生子二人先卒家府没小子憚忱等服膺嚴訓

獲登仕版粗有立于世識者謂先生之志之學蓋有
驗於後矣是用昭揭神道永示來裔銘曰

政為事樞用乃道與學焉而兩不克是為虛拘融體
用於一源宜大行而窮居其命矣夫若或訓斯世而
迪後壽高名而不渝固云先生之知命胡其銜之不抒

碑陰先友記

曹居一字通甫北燕人有文章善談諧以謨畫佐征
南幕府官負外郎卒

劉初字京叔渾源人資純粹早以文章擅名有神川
遜士集行于世弟郁以篆隸真行名家終監察御史
牛天祥字國瑞上黨人深天文武經學歷恒山公府
講議官應東諸侯聘客死聊城

孟道字伯達琅邪人性沉毅有機果威儀抑抑以
業顯東海

趙澄字公靖共城人性純古有儒行終衛州教授
司之才字進道淇門人業詞科有聲場屋間性情直

行口

盧武賢字叔賢燕人資雄峻喜談兵以客卿游諸侯間
王之綱字德柔湯陰人通世務以儒術緣吏事有益
鐵諸論傳相下

邢敏字公達秦人性公直明法令以廉自持用薦授
左司負外郎終大名府判官

李禎字彥祥黎陽人先考同年吏負轉尚書戶部掾
性溫粹以善淑稱

釋朗秀廩延人行精嚴內典外五經子史無不究覽
遠耄期不倦示戒衛之仁化寺

楊果字正卿蒲陰人詞賦第歷劇縣皆有能聲文彩
風流照映一世拜叅知政事終懷孟路總管

董瀛字巨源廉臺人精力有幹局常從王滹南問學
今為淮東按察使

董民譽字端卿陽夏人詞賦第為入渾厚無圭角與
時浮沉常叅預江漢都督府事

劉方字元卿陵川人性清古善歌詩終衛輝路提學
宰沂字魯伯洛陽人才長氣豪抱負奇節嘗與中書

楊維說降西山主帥時人仕之後為王府徵士
張彥字義夫相人性僻直敢從事部府少不合輒望

望弃去

趙鵬字搏霄蒲陰人純粹有著舊風全詞賦進士用
辟舉令泌陽以廉能稱

石蓋德玉字君寶蓋州人性至孝與人交愷悌篤信
義嘗與友共事惡其不直遂絕而不較

勾龍瀛字英孺河南人性方直在河南有詩聲述姓
譜行於世

烏古論貞字正卿遼東人沉毅果敢用廢任內侍官
得幸北渡後歷顯仕於去就不胥

周惠字德甫隰州人性慷慨有大志早貴幸樂與賢
士夫遊終江淮都轉運使

王昌齡字顯之滄州人蘊藉有經濟材由叅議史忠

武府知衛州有惠政在民

李瑞字天祥汲人性強果重義急難凜古人風達吏務有調議於先考執弟子禮終身焉仕至潞州判官王贊字子襄登封人性直諒生平游元劉間好詩學劉冲字造之太原人性剛克敦友義嗜學安貧樂道人善事與心會激節感慨有幽并豪傑氣尤長於左氏春秋

馬寅字致遠許州人性雅重嗜古學恬於仕進

丁君實字仲華錦州人用廕以吏起身有廉德北渡後以前代掌故授禮部郎中致仕

馬佐字佐之滄州人金明昌太學生有賦聲

完顏孟陽字和之遼東人用門資起身為部掾北渡

後不仕好古書家藏至千餘卷

沈侃字和卿魏人資端方精律學嚴而嫉惡由憲臺司法調陵州倅致仕

張善洲字機道譙人少為黃冠師性機警有幹局表表為玄門綱

王磐字文炳永年人經義第人品高邁儀範一世文章精極理要臨大節不可奪今為翰林學士承旨

徒單公履字雲甫遼海人經義第學問該貫善持論世以通儒歸之性純孝樂誨人官至侍講學士

陶諒字信之獲呂人有吏幹歷邑長著能稱

程和字仲美武陟人長管庫材以聚書教子為志竟莫遂而沒哀哉

胡璉字國瑞武安人詞賦第為人慈祥樂易風流偉
德度子祗通有俊材光大其先業

朱萬齡字壽之雲夢人生平以道學自負星曆占筮
乃其所長

楊弘道字叔能涪川人氣高古不事與業磊落有大
志文章極自得趣有小亭集行于世

王信字信之南燕人少為律吏美丰儀嗜酒有氣義
李班字晉伯北燕人性介特少品官子補部掾

趙非熊字周卿安陽人貞祐間嘗以材武選為春官
衛率為人姿嚴厚可任以重事

長樂什表

汝郡王氏其先河南陽武縣園亭人避靖康之亂北

渡河至汲樂其風土衍茨遂占籍為長樂御西晉里

人今墟落南原累累而阜者蓋自肇遷已來丘壠也
族衍代深法不可講合率慕殯兆外特我

曾祖府君以大宗子覩其然而歎曰禮當改卜新任
為王氏第二營明靈其舍諸况責定在我乎於是擇

葬而東得地於第四疇清溝之北自禰而上三世合
群從凡厝者凡餘窆其紹己絕而力弗逮者率棺衾

畢具遠近聚觀莫不欽其孝之至仁之厚也及夫歲
時墓祭先西後東傳于今而不墜百年來墓栢蔚茂

蒼煙梨雪光動林陌識者謂君子之澤淵流而未央
也時則泰和之末大安初年也迨我有元至元十五

年戊寅不肖孫憚由翰林待制授朝列大夫充河北

河南道提刑按察副使明年春三月按部而南過家
上塚首從二墳以封以饗其東仵則繚以短垣周若
干步武復欲發達幽光慨焉莫究訪耆舊則高年俱
盡考世德則旌紀寂寥因念天下之物未有無本而
立捨祖而豐碑者也然遠則疏疏則不親不親則涂
人此世俗之常情也今王氏二百載間丘墓移置者
三始焉西晉里再卜白揚之分白揚而祖西河鄉勢
固有當然者後子孫浸遠吾豈敢必其不源委泮渙
故葉扶疏者哉惟其泝流尋源推末求本明夫當然
之理固不得親其親而豐于昵者矣後之來者能以
吾言世守而不易雖百世可親也而我
祖建遷之義是不可不表見于後曾祖諱經字伯常

讀書不仕以仁厚比一鄉衛人至今以長者稱云銘曰
族萃蕃 理則遷 尊而祖 獲所安
論本根 不易存 祭先河 祖所遵
致時祀 首遠墳 取此法 裕後昆
繫我曾 寔古人 仁之厚 孝之純
西晉里 長樂原 憶墓栢 鑽蒼煙
爵相望 見嬋媯 孰不曰 王氏仵
銘貞石 表先德 陵谷遷 庶可識

管勾推公墓碣銘

公諱德字濟之姓推氏其先相州隆慮人宋季有起
身刀筆至州錄事參軍者以政尚巖明不畏強禦名
大父暨兄金初避仇徙家衛之共城伯祖以材補縣

吏不幸借蚤世考復字永亨時在襁褓母李氏貧不

再提之邑醫杜氏及長就傳其術遂以良醫稱公少穎

異能紹其家學軒岐雷扁已來書浩博不易究悉研

窮機要所得為甚多正大丁亥以方瘍兩科中選由

鑿工補省司管旬公有蘊藉以德將藝為上官推重

生平志存濟物故其診治疾證未嘗以貧富易心理

或未安歸若芒刺在背慊不敢着席初貞祐大兵後

比屋疫作與考謀曰今困厄如是我寔司命可坐視

不掇遂大措湯劑歷飲閭里間其乏粥審者復以米

遺之全活甚衆天興初盜起西山約衆東走汴中涂

遇劫賊熟眠為公遽放仗前謝曰推君父子婦以藥

惠脫我輩命忍以非美加諸餘亦獲免壬辰秋歸隱

蘇嶺老者尊其德病者賴以安而少者訪其學然神

膏傳瘍靈丸起廢鑿家者流正有定法而僻隱贅異

等疾在方伎所無者公率能望知意料而決翕忽死

生之變如程氏子得腹痛疾以食毒治而苦愈亟謁

公狀聞曰此臧疽也已無及矣程不應公曰後三日

當有腐血下而絕及期果然晚節耽翫史籍酣適醪

醴浮沉得喪一寓情栢杓間或勸焉吾方陶然遊太

和之鄉君可去母歟竟以飲致疾終享年七十有二

配乘氏鄉進士彥周之女壺儀母道有承平故家風

範生女子三人長適司候張顯仲女鉅家李氏季歸

王其後公五年卒壽八秩聳顯等合葬古郭里栢門
山南原殿士乘君塋西南隅實至元二年二月四日

也後十五年春憚按部南下躬奠墓次泫然與感縱
羊曇之淚下露襟時思同替終伯道之自遺伊感為
恨何如惟是鑽石紀銘昭告下泉庶幾少有慰焉推
為氏歷考姓書不見惟潛夫論載餘推氏出楚之芊
姓公豈其苗裔乎銘曰

軒岐有書

是為內經

洞達病機

惟明克能

於惟我公

天稟粹靈

靈丸起廢

神膏續脈

不主故常

以益智行

推本所自

其源淵溥

藝精多挾

度貨可居

高下其手

類夫吏胥

繫公馭心

德度愉愉

拯溺拯焚

已焉是圖

相彼陽施

宜嗣厥後

本支顛兀

理莫可究

壘壘堂封

栢山南原

刻銘表公

以慰下泉

雖高深兮易位

尚知為鄉先生推氏之仔

故將仕郎潞州襄垣縣尹李公墓碣銘

世有風誼之士粹出天稟不俟激印鵠鄉曲之譽稱
於士大夫間者李公其人也公諱瑞字天祥其先潞
州上黨人系出唐昭武公抱王之裔五代季遠祖以
官家衛公為人慷慨有機警長身銳目鬚模糊蝟磔
酒酣吐氣抵掌談話而英姿颯爽之餘猶隱然溢眉
睫間少為縣吏錄錄無所見正大間恒山公僊提孤
軍宿汲連九公聲援君時給事莫府參軍李仲愛其

武幹委以赤白囊事公感其知遇晝則荷戈捍侮于
 外夕則抱牘上軍務于府殊赳赳然及宜津撤守跳
 大梁既而京城疫作縱飢民出公倡率流播救死扶
 羸歸那延撒吉似悉編為氓者千七百餘口逮乙未
 春家府一見喜曰此跡弛士也教之當有用遂確夫
 羈厲日致其詳謹焉州召為吏主掾數不胥去壬子
 秋詔以衛六縣為丞相忠武公采地叅卿王公來
 主州治舉能理劇署之典簿領聽其指縱躍如也巨
 細之務釐補肅叙効其用君多俄薦授錄事叅軍兼
 汲邑長將順拊循至有惠愛至元三年總尹陳公以
 材辟府從事六年積前後勞亦牒授潞州判官掾遲下
 位德及民為艱故寬簡持大體謙讓睦僚友聽共佐

理中多裨益了不露已出至上敬下安惟恐秩竟而
 去之遽也九年夏予調官晉府過家上冢胙飲水濱
 話平生甚悉翼日雞一鳴送予遠郊外泣且言曰吾
 老矣不能為升斗祿走形勢途弟相見期邈未知復
 無恙否遂哽噎訣去予亦歔歔之且訝其遽如許
 也其秋以訃來告嗚呼哀哉公事家府執弟子禮三
 十年始終如一日一別終天葬弗逮送吊不及哀銘
 誄未彰有恨何如嗣子震既礮石墓道百拜來請銘
 曰無庸固所願也公姿孝悌憲賓客賑窮繼乏雖脫
 駢指困略無難色至於排難解紛不自顧藉猶焚溺
 之在已復能通下情知疾苦恂恂款款老安少懷與
 人接無貴賤禮夷故牛童馬走盡得其懽心晚節備

嘗世故小心儉畏以省事為樂有訟來質成公溫言
理喻曰緩急人時有也其忍以小忿與怨可退思自
省既而偕謝曰公長者過不敢復聞又善營構事不
為巧飾要以敦鞏延百載上如衛之泮宮潞之儲廩
是也初農民發野塚市甃下令禁焉暴委之患遂絕
士人牛國瑞聞公義託妻子東遊客死聊城為經紀
其家又石其氏者坐事累猝不易辨明索之急投公
匿焉竟賴以脫里有喪率匍匐救視孔懷之情踰於
兄弟至貧不能舉者棺衾坎壙楸柎之物必具葬乃
已其周急趨難甚於已私類若此終飲德不伐閑看
灌鑿樹執鹿衣糲食與老農老圃為伍殆將終身焉
噫褻俗頹波中矯矯然有古義士風出則智効於官

處則行比一鄉可謂不凡者矣士方以壽祉期公一
旦暴殞不及中壽為惑豈氣盛亟衰物剛易折推原
本自理或置然然觀義之所在有不亡者存焉異時
有帶劍喬林讀予文而興起者未必不拜酌公墳俾
配食於縣社也公仕至將仕郎潞州襄垣縣尹命已
下卒春秋六十有四實九年壬申七月十九日也配張
民先卒女二人長曰阿醜女甥魏玠次未竿皆繼公沒
嗣子震實主其喪葬汲縣唐津里清水之南源銘曰

太史著書

游俠與侔

不軌正理

匪暴豪邪

行而宜之

義莫有加

李公之先

奮跡將家

餘烈有光

流而義華

故俠焉負巨先之氣

行焉佩仲由之玃

家府與訓

化而柔嘉

據理施惠

如有等差

越人之難

甚於已私

孤不自存

我衣食之

貧亦喪舉

我棺窆之

野塚纍纍

公助半之

夷考其行

匪義則那

以之莅官

敏而外和

絲枲我理

瘡痍我摩

方百里之命下

俄春者之不歌

心則同單

其如命何

念公平生

涕泗滂沱

番番良聲

公榮寔多

泉流西東

太行峨嵋

我銘刻石

等與不磨

秋澗先生大全文集卷第五十九

